

prědowaše pak hižo mjenje serbski nježli němski, tež bě mjenje serbskich spowědzow nježli němskich. Najwjacy k přeněmčenju wosady je drje přinošował prjedownik Bronišowy, z mjenom Teubner, rodź. Němc z Kemberga w Merseburgskej, kiž bě tam před 1788 z fararjom. Hižo za toho časy so na serbskich kemšach wjacy serbski spěwało njeje, po tajkim drje z cyła ženje! Mateja Broniša slědowaše wot 1826—74 jeho syn Křescán Wylem Broniš, rodź. 5. dec. 1788, znaty serbski spisowaćel, kiž jako far. em. w Drjewku 1882 wumrě. Tón je stajnje jenož němski přědował. — Wučerjo w Pricynje běchu za časy Bronišow Serbja, njewučachu pak ničo serbski. — Tola hišće džensa rozumja někotři stari ludžo tuteje wosady serbski, n. př. w Kosobuzu 6. Za to pak je so serbska drasta hišće krućišo zdžeržala. Njedželu khodža tam hišće starši mužscy z džěla w dołhich módrych kabatach a starše žónske w serbskich běłych kapach ze šěrokimi běłymi krjózami. Młode holcy pak khodža we wołmjanych ropatych krótkich pisanych suknjach a z džěla tež hišće w serbskich ličkatych kapičkach.

#### X. Wosada: Stara Darbnja.

W Darbnjej je serbske přědowanje ze smjerću fararja Lehmanna 1814 přestało. Nowy farań Koethe, rodź. Němc, bě serbske přědowanje z pomocu jenoho wosadneho spowědnika nastajiwši pruhu čitał a před wuzwolenjom wosadže slubił, zo chce serbski dowuknuć. Potom je tež hišće jónu serbski přědował, ale smjeré hubjenje. Tuž powoła cyrkwinsku radu k sebi a džeše: „Džěci, kaž sće widželi, je mi tola hišće džesać króc ćežo serbski nawuknuć, hač Wam na němske přědowanje posłuchać; tohodla njedračujće mje dlěje, chcemy ze serbskim zastać.“ A tak so tež sta. — W Gózdze (Chrandsdorf) do Darbnjeje słušacym je jenička babka hišće serbska.

Přistawk. W susodnej wosadcy Rědorju je Serbowstwo w samsnym času kaž w Darbnjej k rowu šło, předewšěm dokelž tam dla špatneho myta ani serbski ani němski farań dołho njewutra. Znaty farań Hauptmann běše tam serbski nawukł a farań Stempel, kiž w l. 1790 wumrě, je hišće serbski přědował. Jeho naslědnik Lippmann běše Němc, rodź. z Rudohorow, W l. 1830 njebě w Rědorju pječa hižo žadyn Serb wjacy.